

Dithero tsa Tirelano mo Kutlwanong

51/2014 Ka Sontaga 17 morago ga moletlo wa Modimo o o Borarobongwe, e le ka 12.
10. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

Lefoko le le okamelang beke eno le kwadilwe mo go Joh. 5:4b, le re: **"Tumelo ya rona ke yona phenyo e e fentseng lefatshe."**

1. Sefela sa 299 - 274/280

2. Thapelo: Modimo, Rara wa legodimo, re a go leboga, ka o re file gape nako go utlwa Lefoko le le boitshepo la gago. A o ko o re thuse ka Mowa o o Boitshepo wa gago, o o re rutang go tlhaloganya thuto ya gompieno, le go e dirafatsa. Morena, tsoseletsa motho yo mošwa mo go rona gore re tsamaye ka fa pitsong ya rona. O be o re thuse gape go boloka bongwefela jwa Mowa mo kerekeng. Mme la bofelo o re thuse go tsena mo legodimong la gago ka ntlha ya boutlwelo-botlhoko jwa gago jo bo mo go Keresete Jesu. Amen.

3. Lefoko la Testamente e kgologolo le kwadilwe mo go Jesaya 49:1-6;

Epistolo ka fa thulaganyong ya 2 e kwadilwe mo go Baroma 10:9-18;

Efangele ka fa thulaganyong ya 1 e kwadilwe mo go Matheo 15:21-28.

4. A go ipolelwe tumelo ya bokeresete!

5. Sefela sa 279 - 261/268

6. Thapelo ya mmadi wa thero.

7. Epistolo ka fa thulaganyong ya 6 e kwadilwe mo go Baefeso 4:1-6, e re: "Jaanong nna ke le mogolegwi mo Moreneng, ke lo kaela gore lo tsamae ka fa go tshwanetseng pitso e lo biditsweng ka yona ka boikokobetso jotlhe le bonolo le bopelotelele le ka go itshokelana mo loratong; lo tlhoafalele go boloka bongwefela jwa Mowa ka kopanyo ya kagiso: Ke mmele o le mongwe fela le Mowa o le mongwe fela, jaaka lo bileditswe mo

tsholofelong e le nngwe fela ya go bidiwa ga lona; ke Morena a le mongwe fela le tumelo e le nngwe fela le kolobetso e le nngwe fela; ke Modimo o le mongwe fela, one Rra botlhe; o godimo ga botlhe, o dira ka botlhe, o mo go botlhe." Amen.

8. Thero: Phuthego ya Modimo, Epistolo ya thero ya kajeno, e re tshwanetseng go rera kajeno ka yona, ke mafoko a karolo ya bobedi ya lokwalo lwa Baefeso. Mme mo karolong e, Paulo moapostolo, yo o neng a golegilwe ka ntlha ya Efangele ya ga Jesu Keresete, o kaela badumedi ka dithuto le dikaelo tse di lebileng botshelo jwa bone. Bogolo-bogolo o ba kaela go boloka bongwefela jwa Mowa. Fa re utlwa ka bongwefela jwa Mowa, re na le go gopola bongwefela jo Morena Jesu o bo rapeletseng mo go Johane kgaolo ya 17, temana ya 22. Ke gore ka kaelo ya gagwe, moapostolo Paulo o batla sona fela se Morena ka nosi a neng a se batla. Kaelo e e ntseng jalo e batlega le kajeno, gonne boemong jwa bongwefela re bona bogolo dikgaogano. Re ka botsa gore: Re ka boloka jang bongwefela jwa Mowa? Ka fa Epistoleng re bona dikarabo tse pedi. Ke tse: **Re boloka bongwefela jwa Mowa,**

1. fa re tsamaya ka fa go tshwanetseng pitso e re biditsweng ka yona.

2. fa re gopola kopano e re kopantsweng ka yona.

1. Thuto ya ntlha e re: Mo Beibeleng go buiwa gangwe le gape **ka ga pitso e e boitshepo e re biditsweng ka yona.** Mo go 1 Bakorinthe 7:15 re bala Lefoko le le reng: "Modimo o re bileditse kagisong!" Mo Lokwalong lwa ntlha go Bathesalonika 2:12 re utlwa kgothatso ya go sepela ka mokgwa o o tshwanetseng Modimo o o re bileditseng pusong le kgalalelong ya ona. Ee, le mo felong go gongwe Paulo o a ruta, a re: Modimo ga o a re biletsa boitshekologong, o re bileditse boitshepisong, 1 Bathes. 4:7. Jaanong fano mo Epistolong Paulo o re tlhalosetsa pitso ya rona le tsamao ya rona ka dintlha tse nne. A re: Lo tsamaye ka boikokobetso le bonolo le bopelotelele le ka go iphapaanya mo loratong.

Ditsala, yo o ikokobetsang o a itse gore nna ke motho wa khumanego, ke wa boleo fela. Yo o ikokobetsang o itse go bua le Johane, Mokolobetsi, yo o kileng a bua, a re: Nna ga ke na tshwanelo go direla Morena, le e seng go funolola kgole ya setlhako sa gagwe. Ee, moikokobetsi, e bong molaodi wa lekgolo wa Kapernaume, a bua, a re:

Morena, ga go a ntshwanela gore o tsene fa tlase ga ditlhomiso tsa me, Math. 8:8. Yo o ikokobetsang o a itse gore sengwe le sengwe se ke nang naso, ke se amogetse, ke se se tswang mo Modimong. Ga a ikgodise ka dilo tsa gagwe, gongwe ka kitso ya gagwe, gongwe ka tumelo ya gagwe, gongwe ka tthaloganyo ya gagwe. E bile ga a nyatse ba bangwe, mme bogolo o ba kaya ka metlha, fa e le ba bagolo go ene. Go ka bo go le molemo, fa botlhe ba ka bo ba utlwa kaelo ya ga Petoro e e reng: "Lotlhe direlanang ka boikokobetso," 1 Pet. 5:5. Ka go akaretsa re ka re: Yo o ikokobetsang o naya Modimo tlotlo bogolo.

Re ka lemoga gore boikokobetso bo tsamaya mmogo le bonolo le bopelotelele le bopelontle le kagiso le lorato. Ee, dilo tsotlhe tse di kopanngwa ka metlha, fa badumedi ba kaelwa go tshela ka fa pitsong ya bone. Dilo tse ke maungo a Mowa. Dilo tsotlhe tse, mokeresete o ka di ithuta mo Moreneng wa gagwe. Ene ka boene o ne a ipolela, a re: "Ke bonolo le boikokobetso mo pelong." Yo o bonolo o itshwarela ba ba mo leofelang. Ga a kgale, fa ba bangwe ba mo kgala. Ga a lefe bosula ka bosula, gongwe komano ka komano. O tla leka ka metlha go siamisa ba ba ntseng jalo ka mowa o o bonolo ka go ikgopola gore le ene o leofela Modimo, mme o tlhoka boitshwarelo jwa ona.

Ka motho mongwe le mongwe a na le diphoso tsa gagwe, le makoa a gagwe, ka rona rotlhe re tshela ka mekgwa e e farologanyeng ya rona, Paulo o kaela ba ba tshelang mmogo mo phuthegong e le nngwe fela, go iphapaanya mo loratong. Ditsala, se lorato lo se kgonang, re ka se ithuta sentlentele mo sefeleng sa loboko lwa go boka lorato. Ga twe: Lo iphapaanya le dilo tsotlhe, lo dumela dilo tsotlhe, lo solofela dilo tsotlhe, lo itshokela dilo tsotlhe, 1 Bakor. 13:7.

Ka moo, a re sepeleng ka fa kaelong ya Epistolo ya rona, gonne fela fa re dira jalo, re tla boloka bongwefela jwa Mowa. Gonne dilo tse di senyang bongwefela ke kilo le lonyatso le boikgogomoso le go sa utlwane. Ba e leng ba ga Jesu Keresete ba na le go di fenya, le go di ila, le go tsamaya ka fa pitsong e ba bileditsweng ka yona.

2. Thuto ya bobedi e re: Re tla boloka bongwefela, **fa re gopola kopanyo e re kopantsweng ka yona.** Thuto eno e tswa mo ditemaneng tse pedi tsa bofelo. Badumedi ke mmele o Keresete e leng tlhogo ya ona. Mme jaaka ditokololo tsa mmele di dirisana mmogo, di laolwa ke tlhogo, jalo badumedi le bone ba tshwanetse go direlana, le go direla Keresete, e le ka kutlwano le lorato le bongwefela.

Mo mmeleng go aga mowa o le mongwe fela, e bile o tshedisa mmele otlhe. Go tshwanetse go nna jalo le mo phuthegong. Ke Mowa o le mongwe fela o o dirang mo go yona. Dineo tsa Mowa di ka farologana, le fa go ntse jalo e ntse e le Mowa o le mongwe fela o o di dirisang, e le go aga phuthego, e seng go e kgaoganya.

Gonne batho botlhe ba e leng ba ga Keresete, ba na le tsholofelo e le nngwe fela, e bong tsholofelo ya go rua boswa, jaaka Paulo a ruta mo go Baroma 8:17, a re: "Fa re le bana, e bile re baruaboswa, e bong barua-boswa ba Modimo le baruaboswa mmogo le Keresete." Re tla boloka bongwefela, fa re gopola gore rotlhe re rekolotswe ke Morena Jesu a le mongwe fela, yo o re tshololetseng madi a a molemolemo, a a boitshepo a gagwe mo sefapaanong kwa Golegotha, ke ona madi a re a abelwang mo selalelong sa Morena go nna boitshwarelo jwa dibe tsa rona. Ke gore rotlhe re ka pholosiwa ke ene fela. Mme tsela e botlhe ba pholosiwang ka yona ke tsela ya tumelo, ya go dumela mo go Modimo Rara le Morwa le Mowa o o Boitshepo.

Re kolobeditswe ka fa taolong ya ga Jesu Keresete ka kolobetso e le nngwe fela. Ke gore Modimo o dira kgolagano le kopano le rona rotlhe ka kolobetso. Modimo o, ke Rra-rona rotlhe. O re okamela rotlhe, mme o rata go dira ka rona rotlhe. Ee, o rata gore rona rotlhe re leke go dirafatsa thato e e molemo, e e bopelotlhomogi jwa ona. Ke tse dintsi jang ne, tse rona badumedi re di tlhakanetseng mo tumelong e le nngwe fela. Fa re ka bo re gopotse tse tsotlhe tse ka metlha, ruri re ka bo re bolokile bongwefela jwa Mowa.

A Modimo o re thuse ka Mowa wa ona go tlhoafalela sešwa bongwefela joo. Amen.

9.Thapelo: Morena, re lebogela dikaelo tsa gago. O re thuse ka Mowa wa gago gore re se nne bautlwi fela ba tsona, mme re nne badiri ba tsona ka ntlha ya ga Keresete, Morena wa rona. Amen.

Thapelo ya Morena: Rara wa rona yo o mo legodimong ...

10. Sefela sa 300 - 275/282

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke Manfred Nietzke, ka ngwaga wa ?/1996/2002 /2014.

Kgatiso le go rongwa ga dithero tseo go tshegediwa ke kopano e e bidiwang

The Lutheran Heritage Foundation.